

四庫全書

集部

欽定四庫全書

集部

午亭文編卷十三

詳校官庶吉士臣汪彥博

助教臣常循覆勘

總校官庶吉士臣倉聖脉

校對官中書臣牛稔文

謄錄監生臣齊兆求

謄錄監生臣袁繼升

欽定四庫全書

午亭文編卷十二

大學士陳廷敬撰

今體詩

元日直閣中高陽公示和寶坻相公歲除詩次韻

三首

今朝暮景已飛騰拘束翻憐事事能短日暄淒紛屢異  
中年哀樂故相仍愁傾柏酒看兒女獨對椒盤憶友朋

一昔曉鐘霜鬢滿夢迴風雪灑寒燈

日華側近舍元路夜半常隨丞相來  
爛熳星辰天闕上  
青瑩燈火閣門開  
山川禹服平成蹟  
雅頌姬公制作才  
卻為念時添諷詠  
流光荏苒竊趨陪

星霜殘夜入春陰  
節物升平可重尋  
玉几雲霄三殿迴  
鑾輿閣道九門深  
蚤聞伐叛勞師旅  
屢罷朝正塵

帝心坐聽索鈴歸  
舍晚一杯歲酒向誰斟

送董蒼水歸華亭兼寄董閬石諸乾一時蒼水將

遊閩粵

九峰問訊近何如  
數子飄零十載餘  
萬事黃金輸負販  
幾人白首老樵漁  
君今海上求仙藥  
我欲山中葺敝廬  
何限塞鴻淒斷處  
江流西上憶雙魚

送綸霞歸省

送歸郎署栖遲日  
嗟爾承明著作才  
渺渺秋河霜葉下  
蕭蕭寒路朔鴻迴  
黃塵官廨題詩壁  
衰草城隅置酒臺  
遙羨潘輿還御日  
毛生捧檄喜重來

連日入直

鈴索聲高漏點長  
直廬長在殿西廊  
內中數日多

宣召寂寞槐陰閉  
玉堂

禁中春雨

西峯殿閣倚嵯峨  
雨過青山晚翠多  
不識玉泉流近遠  
影娥池水夜增波

懷西山舊遊簡阮亭容齋

磴道盤空山四圍  
暮投林杪翠霏衣  
幽禽大壑柴扉晚

疎磬孤峯夕照微  
杖底登臨秋水落  
坐中風雨塞鴻稀  
夢魂谷口中車路  
猶記蒼茫倒載歸

題北山給事真

青瑣通丹地朱顏老玉墀  
畫圖看十載風貌憶當時  
魚鳥忘機久山林託興奇  
獨慙碌碌者顛顚向經帷

送北山還往平

諫坡郎省幾人存  
拔擢深知國士恩  
暫別雲霄龍尾道  
回看風雨鳳巢痕  
冰銜三字慚吾友  
封事連章感

至尊五岳未須誇  
屐齒恐君逸興太飛翻

次韻葉訥菴見酬拙書春帖子之作

我亦漁樵憶孟諸  
相隨簪筆玉階除  
敢云逸少無臣法  
祇覺中郎有異書  
祕殿敷言長獨對

御牀承旨更誰如  
椒花欲頌慙虛劣  
諫果封題意未疎  
和訥菴憶故山疊前韻見簡

傳柑時節見桃諸  
已老誰能感歲除  
節物一尊殘夜酒  
年華幾卷舊時書  
心憐去日都無處  
夢醒浮生可自如

最是鄉園離別意青山遲暮信音疎

元日再疊前韻酬詡菴

欲向東風弔望諸黃金館在玉階除  
頻年綈几參經席  
輪日牙籤侍

御書師友半生夫子共文章當代幾人如  
春來崇政朝  
朝會名迹相親應未疎

詡菴立春日再疊前韻次答

險韻從茲益去諸懸河瀉水想難除  
偶然節物供題句

終古齋名有讀書

訥菴齋額讀書

紅蓼綠蒿生尚細宮花幡勝

剪能如已過春酒黃柑會與數交游晤合疎

和訥菴立春日口號三長句兼懷阮亭

長鬚更遣致詩頻忘卻新年十日春萬井烟花連閉戶  
六街燈火隔流塵稍憐將老親書卷深覺多愁讓酒巡  
極目川途滿冰雪苑梅官柳暫留人

相思元夜歡游日劉董汪王興未賒

公戲玉虬苦文西樵貽上

客舍

鐙前催羯鼓水樓春盡賦楊花存亡幾處無音耗少壯

于今有鬢華却憶馮唐郎署在閒門深閉苦思家

舊好新知日自非一臺二妙詎相違

時論貽上宜在禁林

寒空駕

鷺春風並燎火魚龍曉勢飛羽檄刺閨時漸少文章報  
國事全稀獵夫漁老吾終去未許君才遂拂衣

上元夜早起

顛倒衣裳月迴明遊人一夜蹋歌聲五更玉笛風蕭瑟  
曾向關山萬里行

照鏡

方鏡青銅鑄得成朱顏曾照幾回明  
亞枝花蕊春風裏點鬢繁霜不世情

逢故人

客中借問是同鄉欲說還鄉已斷腸  
舊日相隨徒侶盡無人解道易霓裳

召見

懋勤殿應

制序有

戊午正月二十二日

召臣廷敬同戶部郎中臣士正且

命各以近詩進見於

懋勤殿

溫語良久至誦

賜石榴子詩風霜歷後舍苞實只有丹心老不迷蒙

恩褒美

命至南書房撤

御膳以賜內侍賚二題

命賦詩夜漏下乃退

萬卷圖書滿

御前賚歌時聽

玉音宣韶華絳闕連深殿春色彤闈接禁筵已見文章  
昭代盛向來雨露上林偏吾

君一德同堯舜長槐夔龍際會年

賜膳恭賦

久泛流霞是露盤每嘗仙膳勝調蘭鳳池日暖

恩波厚內殿猶分玉箸餐

寄李厚菴學士閩中二首

炎風朔雪盡

皇輿孝子忠臣世不如青史數行滇海事丹心千古蠟  
丸書每思慷慨堪流涕實有聲華到索居近直邇英常被  
問已知吾道未全疎

南粵何人憤請纓樓船幕府羽書驚終憐蕭引空安坐

金八八八二  
卷十二  
未許深源有盛名，生死臣心惟勩力。  
艱難天意為銷兵，卻悲離亂晨昏事。  
回首當時捧檄情。

孝昭皇后梓宮遷厝鞏華城恭賦輓詞二首

五年兩度哭長秋，禁掖懷賢慟未休。  
曾見帷車隨鳳翼，忽驚縞素結龍輅。  
梨花寒雨深宮淚，椒寢春風野殿愁。  
舊日上陵同警蹕，幔城蕭瑟翠華留。

曾同宵旰儼慈心，午夜無勞更脫簪。  
環珮未歸

陵路遠風雲已護繚，牆深

閱宮象物春如昨

玉殿容衣晚自臨  
卷耳葛覃遺蹟在  
侍臣沾灑一悲吟  
鞏華城北十里漢  
冠子翼唐劉去華  
故里

野宿寒沙夜火明  
沉沉擊柝響孤城  
支離半枕荒雞夢  
寂寞千秋萬歲名  
諫議祠堂邊草沒  
雍奴丘隴朔雲平  
漢文分地居庸外  
遺廟何人問顧成

入直南書房紀事

給札朝朝赴蚤暉  
玉階花落曉鶯飛  
也知天上塵凡隔

未信仙官職事稀  
繚繞文書堆硯墨  
聯翩詩句滿宮闈  
紅牆咫尺人間路  
魚鑰銅壺下漏歸

賜五臺山新貢天花恭紀

有序

閏三月臣廷敬同翰林院侍讀臣士正直南書房蓋是

時臣謬掌翰林篆前後同內直諸臣率常寓直是日蒙

賜手詔朕召卿等編輯適五臺山新貢天花鮮馨罕有

可稱佳味特賜卿等使知名山風土也臣恭紀

珍蔬遠貢自瑤岑翰墨

親題賜禁林

三殿恩頒天上蚤

九重封送

御前深含風玉蒂香仍動暎日金莖露未沉退食和羹  
添味美鹽梅還欲效餘箴

賜櫻桃

清曉朱櫻進內園每從丹禁飫頻繁雲霞百子池頭色  
風露三霄殿上恩

賜觀人參植本應

制

三楹玉蕊三珠樹五葉銅池五色雲不是乍從天上見  
多應空向世間聞

賜御書恭紀二首

有序

二十八日

賜掌院學士

臣

廷敬侍讀學士

臣

方藹侍讀

臣

士正

御書

臣

得龍飛鳳舞大字唐人王涯早春宮詞又石刻

清慎勤格物大字二幅

行盡金坡近玉清牙籤綈几影縱橫瑤箋露濕

宸章潤寶墨香舍

御氣清霞起雲蒸同日麗珠聯壁綴自天成萬幾宵旰  
逢時暇惟有書奩適

聖情

天藻真題龍鳳署玉堂今刻

御書碑日星文曜施丹地雲漢乾光照赤墀親見驪珠

初迸落捧來鸞紙正淋漓流輝館閣傳青簡吞竊儒臣

際會奇

龍飛鳳舞四字請刻石翰林署中今恭置敬一亭

世祖章皇帝御書正大光明四字

上御製題跋勒石

賜觀於

內殿進詩一首

曾侍

先皇近玉除龍鸞重捧九霄書

兩朝寶翰輝天府奕葉奎文映禁廬典冊星雲光絢爛  
勛華日月氣扶輿還思開國規模遠金匱藏編在石渠

恭和

御製喜雨詩

乍拂觚稜滿禁城宮花含色柳烟輕風雲萬象供

天藻雨露三農見

聖情

孝昭皇后輓詞四首

正位名初定彌留淚已揮

內朝臨日少宮仗列來稀  
半載新龍節三春舊玉衣  
淒風掖門道慘慘動幢旂

禮自中闈進

恩還禁籞長鏡奩留偃月  
圖史在披香玉燕空蕭瑟  
金蠶竟渺茫惟餘憂國念  
流慟徧遐方

問寢

重闌日

宮輿早並來烟花連複道歲月在蓬萊春咽銅龍漏香  
銷寶露杯含情思婦順灑淚閣門迴

京室任姜盛

徽音禁苑知軒星沉彩曜花月掩容儀典冊光千古哀  
榮並一時青編與彤管紀美在風詩

上御神武門觀西洋進貢獅子

皇威遠被海西偏靈產欣觀自九天王會地圖過禹服  
帝疆方物集堯年條支入貢龍沙外烏弋隨朝鳳闕前

從此上林添獸簿定知不賞耆夫賢

蚤赴

內直同貽上

楊柳紅牆映碧波月明騎馬共婆婆不知玉漏添如許  
秋水潺湲一夜多

八月十八日

上御懋勤殿

召臣  
廷敬賜之坐

命賦經筵進講詩臣倉猝賦就退而謹錄其句

頻年橐筆侍延英

御札分題見

睿情白玉螭頭闌畔立青花龍尾道邊行談經往苒文  
馬用論藝逡巡句未成又是

深恩逢造膝儒臣何以荅殊榮

恭和

御製賜輔國將軍俄啟詩有序

二十一日同侍讀學士

臣

方藹

臣

英侍讀

臣

士正中書

舍人

臣

士奇奉

旨賦

沛上雲飛起大風射生猿臂挽強弓日邊蚤識龍孫貴

天際新傳

鳳藻雄

九日入直同詔菴敷復澹人近公限登字高字二

首

禁苑秋來爽氣澄  
寒花時節伴茵憑  
曉風閣道傳銀箭  
夜色銅扉帶玉繩  
臨渭新詩工最擅  
集賢別會寵難勝  
龍沙鳳嶺休還憶  
閭闔三霄日共登

授簡從游盡譽髦  
年華荏苒在詞曹  
九秋最覺清都近  
四海無如此地高  
戎馬禁中思李牧  
文章輦路羨枚臯  
歲時空負

君恩重遮莫黃花笑鬢毛

聞湖南捷音恭和

聖製

鏡吹騰歡幕上來弓懸江月劍花開

天家蚤就麒麟閣直待將軍汗馬來

賜觀

御製詩

并序

歲戊午秋九月

上奉

太皇太后幸溫泉以時享

太廟還宮行在凡十七日

御製古今詩二十一章十月朔日

召臣廷敬

賜觀臣職叨簪筆學愧面牆久依帷幄之傍親覩文章之盛瞻雲就日靡罄高深測海闢天徒滋謏陋今讀

聖製彌廡繹思譬諸黃鐘天球自洋洋而竦聽穆乎璿霄碧漢仍蕩蕩而難名昔聞劉勰云睿哲之心懸於日月益信揚雄謂聖人之言炳於丹青況逢

盛世賡歌非若唐宗之試宮體自顧庸姿率惟慕永叔之記賜書蓋以

聖哲之君其臣莫及遂令制作之善振古為昭謹拜手而颺言爰齋心而獻頌恭賦五言二十四韻進呈

睿覽不勝欣惕交并之至

聖母歡清暇

天王奉豫遊龍光扶翠輦

鳳藻麗皇州巡省經過處篇章次第留霜鐘深殿曉丹

葉禁門秋繡轂環千騎金鞍從列侯山川為別苑笳鼓  
在行騶九塞連軍戍三河抱縣樓帷宮朝警蹕星漏夜  
移籌縹緲中盤寺登臨最上頭古臺傳舞劍重嶺應鳴  
蚪碣石邊雲合盧龍海氣浮望

陵松柏遠薦寢鼎湖幽風雨開旄鉞乾坤正冕旒羽林  
嚴伏謁仙仗迴含愁寒路迴芝蓋溫湯駐采旂陽和長  
不減功化邈難儔紅檻艷氍毹黃簾玳瑁鉤濕花漂砌  
近香草映波流玉甃連阿閣瑤池到十洲

起居陪大駕符瑞出靈湫

萬壽慈寧膳清躬饗廟羞往來見誠孝製述必殊尤毫  
翰乾文煥詩思溟渤搜虛懷蒙

寵問忭舞答神庥

賜文雉恭紀四首

旌門尾扇羽林兵竟為斟羹校獵行回輦九天先奏進

親調玉膳慰

慈情

射聲一矢疊霜空萬歲齊呼羽仗中陳寶祠前休悵望  
官家已並得雌雄

三面親驅祝網歸錦禽

宣賜有光輝饗人未擬鸞刀割曾近

君王玉轡飛

尚方筆札大官餐珍賜時

頒出上闌繡臆花鋪金絡馬分明誇向路人看

鞏華城陪祀

孝昭皇后梓宮卽事恭紀二十四韻

宿雨郊原外雞鳴夜渺漫早行分夢短往路入吟寬肅  
肅白楊晚依依青柳殘微雲舒綺縠晨漢沒波湍禾黍  
西風落茅茨曉露溥野花邀翠憶蔓草簇銀鞍徑闢蒼  
烟斷窓虛綠樹攢旌旗思警蹕軒砌想鳴鑾

萬乘經過地茲遊爛熳看入門詢

蓀翰再拜肅衣冠日月乾光曜蛟螭

御氣蟠彩毫題別墅金榜賜臺官灌莽天香接瓊瑤寶

篆刊未來真繼繼欲去尚盤桓

清河胡御史山莊有御書在焉

落日

山逾靜清流自寒飛梁疏瀕洞複嶂疊巔屹行殿何  
蕭瑟孤城此鬱盤神光春杳杳環珮暮珊珊鳳翥椒風  
隔龍樓桂月團內人思未已陞楫渡交彈砧杵淒宮掖  
梧桐黯井幹歲時臨幄次燈火駐河干回首芳華歇仙  
遊節序闌鵠鴻續來往歸馬獨蹢躅

陟屺樓詩二十首

并序

陟屺樓在百鶴阡西余居樓中踰再暮矣乃始為詩凡

詩之作為吾母也因以陟屺名篇

冢樹蕭晨響正悲祥琴欲奏已淒其白沙霜凍霑衣蚤  
黃葉風翻度隴遲臨老泉臺多骨肉十年存歿自分離  
幾回夢見容顏在猶是高堂遠別時

兩年丙舍此棲遲弔影空山夕照時野草春添新復土  
隧松涕損舊霑枝折殘屐齒悲毛義隱去縣封愧介推  
悔向風塵耽祿仕苦身勑力鬢成絲

四尺新封馬鬣低重泉沈痛杳含悽香燈蚤上陰風起

烟火全稀苦霧迷大野蒼涼人獨往亂山昏黑虎時啼  
墓田方畝春泥外老學躬耕自把犁

白日荒荒冷舊扉高原哀輓露何晞人無周勃吹簫送  
客有陶家化鶴飛

百鶴集  
家上

歲月再暮真過隙笙歌十日

盡霑衣泉門自掩千重恨雲散空堂黯不歸

關塞飄搖起戰塵倚閭長罷事酸辛還憐槁項憂時日  
已誤青袍奉母人杖節更誰能報

主絕裾空自忍辭親棧雲隴月愁如許嗚咽寒宵一愴

神

敢道肩輿上殿行  
軟紅塵土最傷情  
十年趨走春前恨  
兩字音書望裏驚  
長樂鼓鐘疑夢寐  
直廬燈火憶平生  
小人有母今安在  
曾遺

君王舊賜羹

祕殿深嚴畫漏閒

御書房在碧虛間  
遙思

中禁從容地  
別有東頭供奉班  
風雨三春辭鳳侶  
雲霄

萬里夢

龍顏只今月落烏啼夜羞點蛾眉兩鬢斑

紀內直也

告謁空懷未上書較殘朱墨玉編餘

時預修太宗文皇帝實錄

聖朝孝治恩元重臣子私情願已疎烏烏舊樓宮樹晚  
鵷鷺長別禁林虛衣冠原廟勤時享法從曾陪濫石渠  
罷直

乾清刻漏傳詞臣奏事閣門前幾回中使蒙宣問曾道

天顏賜閔憐

紀葉學士方藹張庶子英奏臣丁憂事

講席乍溫違玉几書

簾初冷輟瑤編夢魂兩載趨丹地白首青燈一惘然  
當年文獻僅猶存特為儒臣命討論慰問

本朝無故事便蕃千載自

新恩賜茶雪乳分供御漬酒金飛出上尊天使一時增感動傳宣

帝語是春溫

詔閣臣察前明實錄慰問例具聞遣內閣學士屯泰翰林掌院事學士喇沙里賚

賜乳茶桐酒四器蓋慰問之典實始於臣云

隨例榮光亦

至恩絲綸

特旨出臨軒微勞似髮叨三錫

厚澤如天到九原

部議以臣母用詹事封例無卹典上憫臣侍從微勞用學士品級賜卹

石闕龍鸞迴

藻翰冢碑星斗爛荒垣却思灑淚春明路回首孤臣已斷魂  
麻衣扶杖薊城西痛哭荒郊落日低野宿寒沙惟過雁  
蚤行茅店不聞雞朋簪有夢知離散鄰杵無聲助慘悽  
相別銷魂橋上柳夜烏猶為昔時啼

西園東閣想儀型聖室霜天望壁星紗幔秋殘悲舊業

機絲夜冷泣遺經綸扉大手摩霄赤藜火新編照汗青

師友謬恩霑不細蓼莪廢罷淚還零

高陽館師表先淑人墓葉訥菴學士

為立傳

一別相思在禁林光華碑版未銷沉臨文已踐升堂約

葢石空憐負土心三歎似因聞寶瑟長悲真欲廢祥琴

茗文嘗辨祥琴為非禮

吞聲憶取燈窓語獨向殘經細討尋

汪茗文編

修為先淑人銘

舊遊名德是人師相我號天伏地時萬事臨危千古恨

此生難報寸心知中朝司馬應安好湖海元龍久退衰

自守殘書甘薄澹他年無愧故山期

指魏環溪先生

殘臘東風斗柄移灞橋三度柳條垂生芻致遠思徐樨  
截髮留賓有范逵遊子頻年諳物態孤蹤四海問心知  
天涯門外多春草長守田廬記歲時

村鐙宰木影縱橫獨宿高原萬感生碧嶂夜猿啼有怨  
黃沙石虎卧無情春歸老屋家如寄月墮荒丘路不明  
屈指禪除將欲近纔思去住淚交傾

急雨淒風意若何天寒歲晚在山阿人生兄弟真難再  
我老妻孥苦患多往事庭闈誰訴語向來身世足悲歌  
那堪抔土荒涼處躡磴攀林祇自過

萬壑青山一病身霜風搖落自傷神嶺鐘夜度不知處  
壠月秋來故照人詩卷市朝堪斷續音書京雒付沈淪  
只應料理餘生事體受歸全是報親

黃卷中閨映白頭班家孟母並朋儔珮環東觀藏書閣  
纓履西原陟屺樓縹緲雲山千疊恨迷離草土百年愁

吟成霑灑梅花候苦憶天香學冥搜

予九歲作牡丹詩母見而異之

百鶴新阡十景詩

并序

洞陽旋馬

洞陽洞天踞勢北維昂首而東天馬行空跨騰欲下接  
嶺連峰逶迤入障志稱岳神山者蓋嘗標靈著異云

天馬騰驤東欲來洞陽弭節尚裊裊二條氣色排空至  
萬里風雷掣電開瑤圃回看平似掌黃河立飲小如杯  
銅鬚玉鬚青霄外長伴麒麟卧石苔

卧笏回龍

岳神之南開屏列障儼若拱向稍西則山巒橫出形肖  
卧笏阡實落脉還顧洞陽雲垂烟接山巾谿環故曰回  
龍也

曾聞萬笏朝天轟今見神龍跼地長已挾風霆身變化  
故驚鱗爪勢回翔從雲漠漠噓重壤行雨濛濛潤八荒  
蚤握驪珠堪照耀斗間五色映琳琅

品字珠屏

阡後三山形立如品字中之一峯昇眺遐濶勢盡千里而北望洞陽測以圭景不失杪忽正阡之主山也

台星入座夜珠明品字屏風類削成似擁鵷鸞朝帝去卻排閭闔侍天行芙蓉九蕊雲中色環珮三階月下聲爭道神工開闢巧羣峰羅列抱層城

書臺繡几

阡之前曰書臺山層岡秀出中曲兩垂如月偃弓眠其上則奇松異花被於崖谷丹碧綺錯如畫宛若繡几也

丹地深巖歲屢移天寒月落影蛾池雲霄經席承  
恩日霜露書臺憶母時銅尺牙籤新玉案青燈黃卷偕  
機絲白頭贏得如綸寵若斧封成萬古悲

楹山疊翠

楹山在洞陽山之右新阡之左秀障千霄壁峙霞舉離  
立天外如拱如揖老松古栢飾巖蔽壑實巨觀也

蒼松中倚玉闌干天外樓高翠欲團地界河山為左輔  
峯迴屏障自千盤扶桑弄影青空濶太華連雲碧落寬

似有綵虹平接席旌幢前導後乘鸞

沁水環流

山海經云謁戾之山沁水出焉茲入乾歷兌抱阡左沙繞幢東出繚如縈帶翼岸夾山如為新阡特設也

繚河縈帶鎖遙峯雲起霞明色正濃九曲分流還抱嶂百川終古自朝宗波濤日月虞淵壯風雨蛟龍貝闕重欲攬鳳皇池上水丹霄長映紫泥封

萬松聳峙

阡之地統名樊山尊嚴秀拔衆山之長蒼松萬數蔭峯  
隱谷相傳神人所種植其大者以圍計之數十也

四圍峰色故依然萬壑松濤勢接連天巧不煩神禹跡  
仙人似種漢皇年枝盤蒼昊青鸞度蓋倚丹霞彩鳳蹇  
為謝山靈留勝蹟只應此處問牛眠

百鶴來翔

封山之曰白鶴百餘自西徂東至阡之中翔翔欲下久  
之乃去開墻之曰鶴又復來阡之名由此稱焉

臨水登山秋氣清  
仙禽遙集若為情  
青田養就雲初白  
華表來時月正明  
北戒關河行處遠  
南條烟水接天平  
摩崖駐嶺回翔地  
百鶴新阡送美名

慈泉乳水

山巔去地千仞岩  
岩孤上其陽有泉  
其巨若輪其深盈  
尺甘泉溫冽居人  
賴之以給晨昏揭  
其名曰慈泉志母  
恩也

神臯乳水接崑崙  
崑崙天與慈泉見  
母恩丙舍桑麻深  
雨露

山家飲啄長兒孫銀河倒影流霞動玉甃含暉浴日溫  
最訝興雲蒸霧力長將時雨徧郊原

神樹天香

阡之西古東嶽廟廟兩階各牡丹一本黃蛇守其下人  
莫敢攀折枝幹輪囷四蔭廟中花開輒數千頭也

古廟空山占物華石闌雙本牡丹花染香面面臨芳樹  
堆錦枝枝貫月槎寶艷雲霞舒日景神靈烟雨護天葩  
玉房金蕊紛如此瑤草仙源路未賒

山行二首

旅館寒燈信宿眠  
客心去住杳如年  
夢回春月春花夜  
依舊啼烏泣墓田

客路栖栖老更驚  
山人只作看山行  
冶桃狂柳紛無賴  
白髮春風也自生

陟屺樓別詩二首

松際昏鐘出翠微  
淹留山鳥莫催歸  
西樓明月關河路  
春雁南來又北飛

壠上東風春草青春明感舊惜飄零縣橋官柳銷魂處  
愁見長條拂短亭

別守冢人

萬樹青松萬簇花居人惟有兩三家因君更灑思親淚  
泣向寒雲隴日斜

次韻補和李容齋少司農送別二首

回首流年逐景光白雲慘澹日昏黃驟辭蓬閣如前世  
重渡桑乾是故鄉草澤夢魂稀語笑雲霄契濶在班行

傷心趨走金明路春月三回直北望

瓊瑤開篋客心驚團扇三年故舊情草色含悲連大野  
柳條惜別向春明

朝廷開濟須公等閭左耕徭託此生為報石壕村吏少  
司農憂國早知名

得君文請急還長洲書卻寄六首

頭白何時見汗青禁門深籍鎖寒廳應知別筍多歲葉  
歸向名山作一經

桐酒團茶自上方

御錢餅餌賜新嘗  
江東大有思歸客  
千里尊羹味許長  
白首何緣問故新  
驪駒聲斷堠傍塵  
青門楊柳春如舊  
相送城門更幾人

萬壑千巖老一村  
太行枝隴敢言尊  
吳山楚水堪乘興  
更向堯峯與細論

乞守何曾得越州  
還鄉終賜曲湖遊  
洞庭雲樹三江水  
一棹歸來合得休

出處年來肯異君  
西窓苦語記離分  
已違白首江湖約  
留取青山日暮雲

畫卧百鶴阡古廟中夢愚山茗文

聞道長洲請急回  
宛陵侍

帝在蓬萊江湖闊  
塞三千里何得聯翩入夢來

村舍贈別焦僉事

禁門清漏往時同  
一宿孤村邂逅中  
雙隻堠邊芳草暗  
短長亭畔夕陽紅  
軒車已決崇朝雨  
繡斧行開萬里風

幕府如今並才俊柴扉安隱藉羣公

星軺驛送人之官中州

留客雞鳴夜色悽使君匹馬萬峯西太行枝隴浮空盡  
砥柱烟巒接近低別路雲山勞悵望對牀風雨惜分攜  
河淇亦有萊公竹相映潘生花滿谿

樊川雜詩三首

山翠微茫積翠分野花細草入斜曛獨行惆悵緣何事  
目斷南谿日暮雲

欲別樊川欲斷魂  
輕雲細雨濕苔痕  
最憐綠樹通幽幌  
月送花陰不閉門

細蕊孤花太有情  
春風作意送人行  
誰言南浦傷心地  
草色年年不更生

與豫朋往石間

白石清沙古澗深  
川長秋氣遠相侵  
往來蹤跡看流水  
去住羈栖羨野禽  
伴老癡兒諳旅宿  
懶行疲馬戀谿陰  
三年斷續殘詩卷  
新句含悲自一吟

午睡醒得茗文書

清風一枕北窓眠  
門外音書剥啄傳  
欲覺軟紅塵夢斷  
夕陽千里草連天

聞砧二首

蹉跎春晚向秋清  
為別南谿緩北行  
欲理征衣無意緒  
忽聽砧杵動離聲

野館清砧不可聞  
更堪獨立近斜曛  
何人解識徘徊意  
惟有松間石上雲

石閭道院二首

空山小住又經旬  
草屋孤村無四鄰  
咫尺夕陽連暮雨  
三叉古路少行人  
牛闌嶺上收常蚤  
虎跡泥中見又新  
寂寞不嫌樵牧者  
來時一別一傷神

急雨清宵古廟中  
長松小院下秋風  
時疑石澗翻驚瀑  
頓覺巖泉接灌筒  
遠夢關山雙鬢白  
鄰雞籬落一燈紅  
到家却作無家客  
襖被衝泥類轉蓬

與石閭禪人二首

曾題舊句已朦朧古壁蝸涎伴網蟲  
此處無人解文字  
不須重著碧紗籠

雨笠烟蓑風露餐獵師仙客久盤桓  
夜窻芋熟松明火  
出處無心問懶殘

午亭文編卷十二

欽定四庫全書

午亭文編卷十三

大學士陳廷敬撰

今體詩

南谿贈別

南谿卜築快幽深  
況有樓居俯茂林  
老至圖書從散亂  
春歸魚鳥任浮沉  
山畦花藥波紅雨  
軒砌藤蘿暈綠陰  
欲別夜闌勤秉燭  
祇應明月照分襟

次韻張子礎副憲兼懷竇在茲秀才

前後清班忝竊同白頭相見意何窮  
春來御水還新綠別後東華自軟紅  
已共侯生溫釣石蚤輸弘景卧松風  
未應回首蓬山路林壑鶯花竟付公

辛酉八月北上道中寄里中游好四首

空山獨往已三年近日羣游亦可憐  
風雨斷魂迷隴上關河雙淚落燈前  
離觴幾處還三宿野館今宵是別筵  
一夜西樓纔小寐馬嘶人語聽淒然

玉鵲菴西山寺東黃鶯送客訴春風花殘簾閣閒門閉  
柳老河梁別席空鄉樹斜陽迷故壘郵亭夕露濕寒叢  
栖栖夜火投人處宿鳥深枝笑轉蓬

二十年前燈火地暫來重別易沾裳已無揚子一廬老  
空有陶家三徑荒河漢影斜明月在館池人散朔風涼  
牀頭驛道車輪過半枕關山夢許長

望遠脩門再往來秋霖秋日此裴裒身隨旅雁辭家去  
心逐居人送我回落木天風催遠別寒花客路為誰開

山川到處傷離別數日旗亭酒數杯

小山

城西前日吾來處野徑清流竹樹斜日暮出城拚一過  
不因水石為思家

三家店溫生具食

出門已昏黑煙火隔城闌纔宿三家店便為千里人  
豆羹肥勝肉柿酒白如銀邂逅臨岐路情同故舊親

過高平弔畢亮四方伯二首

重過躬耕地秋原木葉稀一哀銜別路雙淚落行衣書

札臨危在文章託付非淒涼荒宅里清德耿餘輝

先生遺

藁屬余

訂定

寒露淒淒重悲雲漠漠清松楸憐昔恨絮酒慟餘生暮

景衰容慘西風老淚傾那堪車馬色霑灑向長征

余居隴側

先生數以書存問

### 野店曉發

三日山程十日行郵亭漏鼓夜分明寒雞已報清霜曉

夢後家園別後情

潞安城南柳林二首

一路黃沙白日寒  
柳林秋色送征鞍  
更堪昨夜西風落  
霜葉烟條太已殘

野路籬花放蕊新  
古墩殘柳閱黃塵  
葉稀風起逢搖落  
猶挽長條贈遠人

渡河歌

白雲渡河河水陰  
朔風卷雲飛遠岑  
渡頭舟子青山曲

賈客相看淚滿襟

屯留道中二首

留滯鄉關路淒迷小縣城野禽呼有字村店問無名秋  
樹變黃綠漳流兼濁清山川與時物不減別離情

鄉縣烟林外停車記昔曾此行秋色晚再別意難勝苦  
憶黃花放生憐白鬢增荒城時一憩未敢夢觚稜

九日屯留客舍

九日孤城對夕陽空階人靜館垣荒寒花寂寂開閒戍

落木蕭蕭下濁漳只有雁鴻聞  
悵悵即無風雨意蒼茫  
未須更約登高處客路何時不望鄉

沁州道中

山館郵籤數去程短長亭堠送人行  
悲風落葉銅鞮道  
細雨寒蕪石勒城漸遠關河秋色盡  
欲投烟火暮雲平  
荒郊茅店淒其夜白髮黃塵莽自驚

發沁州懷銅川

赤嶂黃沙草樹荒銅鞮山色頗蒼蒼  
離心隻堠兼雙堠

客淚清漳並濁漳野宿征夫連曉語南飛旅雁背人翔  
雞鳴往路空回首惆悵衣篝五夜霜

漳水源

水石漳源鎮清漳自此流金風吹素瀨玉鏡瀉靈湫  
斗收形小蛟龍託勢幽土人思德澤鼓笛賽春秋

縣山

晉侯旌善地夫子渺難攀野草環封界秋風繇上山  
蛇龍今寂寞水石日潺湲有母能偕隱蒼茫掩涕還

龍洲驛雪懷南溪

九月并州道飄飄早雪飛風兼木葉下寒映麥苗稀郵  
驛人踪疊雲山鳥路微南溪此時節籬菊正依依

太原城南二首

車馬斜暉不入城野亭北望路分明翻愁噉噉南鴻去  
却作天涯送客聲

秋草寒雲壠麥遲嘉禾難見穎同時夜聞蟋蟀還多感  
惆悵唐風歲暮時

太原客夜

霜橫月落曙燈親  
一夜邊城刻漏頻  
二十五聲秋點盡  
直教點點到愁人

客舍遇張子美

蕭瑟霜風日夜吹  
棲遲客舍晚支離  
耽書似蠹空鑽紙  
兀坐如蠶自裹絲  
為別鄉山行漸緩  
偶逢舊故語移時  
還思接屋連牆日  
相對天涯是路岐

土橋柳

柳未全凋葉半新  
土橋風暖拂行塵  
邊關景物今如此  
回首家園十月春

悟劉訓夫提學旋別

冰雪風裁水鑒方  
三年交儆寸心長  
相逢前路無知己  
未出并州是故鄉  
桑落酒清離恨重  
柳條風緊客情傷  
絳紗欲徹歸

朝近應許追陪駕  
鷺行

鳴謙驛留別訓夫疊前韻

驢駒欲駕隻輪方相送躊躇別語長去遠心翻隨去雁  
還朝情未似還鄉經橫馬悵人初過客退龍門意轉傷  
鎖院弟兄京雒舊十年衰颯愧班行

宿壽陽用韓公夕次壽陽驛題吳郎中詩韻寄弟  
素心里中與可京師

如今薊北是長安纔過并州客路寒憶別汝時花共柳  
今宵三處月團團

未至井陘口七里槐林鎮宿

翠蛟潭自險青玉峽空名土屋懸崖置沙田帶石耕晚  
風山鬼歎夜月野雞鳴浩蕩關門近悠悠行旅情

過井陘口暮投縣索逆旅主人不得行三十里宿

微水舖

朝從井陘過暮向井陘投明月關門閉西風塞水流青  
山連粉堞黃葉隱朱樓行路誰相識樓樓夜未休

先夫人服除抵京詣

宮門候

安蒙遣臣英臣士奇慰問恭紀

東華塵土帶征鞍三載重來鬢髮斑  
通謁竟由中貴使問安許點閣門班  
傳宣去久勞

垂憶別奏歸朝損舊顏

天語一時紛感激不禁清淚落潺湲

滇南大捷詩十首

夜半傳呼萬歲聲邊書送喜拔圍城  
霜天破賊烟塵靜不待新年賀太平

羽騎星流掣電飛宮門霜月照行衣金鉦夜警投叢夢  
知是征南奏捷歸

玉座紗燈奏草開捷音傳送滿宮來天雞未動銅龍闕  
親報

慈寧萬喜回

玉斧金戈

寢殿開嘶風石馬殷奔雷

翠華正值朝

陵日輦上連章露布來

烽火雙懸大將旗孤城三道集

王師遙知銅柱銷兵地別號昆明洗甲池

碧雞騰距古梁州飲馬瀾滄水不流

廟略有征無戰鬪手提滇海付金甌

一舉樓船定海隅雕題卉服效前驅三軍所過都無恙

况復頻年

詔賜租

萬年歷數尊王會一統山河點霸圖  
文德武功相並美  
應教大政紀平吳

邊機兵畫在深宮伐叛謀成

睿想中上將指麾皆

廟算板舌恢拓是

神功

索鈴神撼檄書成幾載憂勤識

聖情別奏凱歌人共樂先教傳唱羽林兵

送張敦復學士還桐城二首

詔恩相見慰浮沉往事分明思不禁  
朝退常陪經席蚤  
內中初設直廬深蓬山地近天人別  
溫樹春歸歲月侵  
我去三年君宛在重來還對欲分襟  
辛酉還闕命學士慰問於宮門

門外桐陂水驛通櫻桃初熟落帆風  
別來客鬢愁先白

到日江亭問也紅

也紅敦復亭予為作記

偕隱已悲鯨嶺上耦耕

終約五湖東我來君去如相避  
解道人生是轉蓬

送汪舟次檢討使流求二首

萬里滄波使

三宮法從班吾曾泛積水別久問神山天遠客星見孤帆  
秋汐還丈夫事異域那肯老離顏

彭湖接烟火軍鼓亦闐闐絕島真無地中原只有天節旄  
來殿闕戈甲在樓船借問隆慮平聲將何如陸賈賢

禮闈校士得十四韻

數到掄才地承

恩自禁林纔移經席仗猶殷屬車音白首冰銜晚青春  
鎖院深昔遊思亘褐榮路愧華簪銀燭三條盡銅壺午  
夜侵苑花應冉冉聞棘自森森簾下經過斷風前語笑  
沉樓明金榜月臺轉玉衡參地鄰觀象臺屢輟中宵夢回憐  
瀑直心香凝新繡網寒戀舊綾衾忝竊繁文字蹉跎細  
討尋池邊躡豈鳳書裏穴成蟬典職堪遲暮登賢鬱滯  
淫不辭鉤校切有暇得微吟

聞夜夢母

一夜春寒憶故山五更雙淚落潺湲重簾不鎖還鄉夢  
攏樹花時見母顏

瑣闌將出呈諸公

忝接公卿席簪裾此地逢到來堦草長相憶野花濃  
暗鳴禽曙簾深報鼓重對牀燈火夕回首是離悰

簡胡聖年八十別而再會於京師尚健無恙喜而  
有贈

物候青春晚交情白首長三年為客在八十別來彊難

老逢人少無憂羨汝狂平生瀟灑意相見不能忘

春夜憶舊遊示豫朋

獨宿寒齋夜悄然關山丘隴鬱高阡還如三載棲遲意  
未了平生寂寞緣漏轉微鐘時憶舊夢回殘月不成眠  
分明陟屺樓中事未斷相從最汝憐

小屋

小屋幽居稱蓬茅作意低窓開如釣舫籬插似村溪絮  
柳縈簾近錢荷貼水齊景光還自愛未覺是羈栖

登樓寄遠

戶牖長岑寂殘書且罷休  
落花時倚檻斜日一登樓  
白髮堪多病青春抵暮愁  
飛雲如有意冉冉下南州

西樓懷潛菴時為先生較勘文集

多病兼愁思登臨每獨來  
孤雲一飄渺萬里共裴裒  
文字堪心得風塵暫眼開  
頓忘形氣小空濶坐悠哉

上手勅念諸臣勞命公暇遊賞苑中網魚攜歸恭述  
渺渺蓬池接露臺銀河一道象昭回  
金華不輟宵衣直

玉几還隨講席來  
記憶從官三伏近  
傳宣

御札十行開侍臣  
空自慚歸遺曼倩  
當時未易才

直講口號

呆鷁流影照青規  
黃卷丹霄幾鬢絲  
簾外卻看閑抵戲  
羨他無事羽林兒

恭和

御製送杜相國致政歸寶坻

十年深密地親見  
翊承平龍尾隨天  
路螭頭直殿楹歸

田三疏意祖帳百僚情廢和懷賢什霽章麗太清

恭和

御製送馮相國致政歸益都

河山還禹蹟帶礪得堯年嶽攬岱宗石海歸星宿泉身  
名多上相出處在高賢日觀登臨數長懷直北天

八月八日

賜觀

御府藏畫於

內殿進詩二首

輕綃潑墨憶從容  
祕殿收來

御印封掩映液池  
秋水色依稀  
仙仗翠微峯  
金函鎖處  
銜蹲鳳玉軸  
開時耀燭龍  
自是山川羅萬國  
畫圖江海  
見朝宗

丹青龍蹴海三山  
銅鴨香開玉座間  
枝繞萬年花爛漫  
池添百子水潺湲  
紅羅夜閣胭脂濕  
碧鏤春韋翡翠還  
暇日每蒙

天一笑畫中金粉解承顏

十二日蒙

召至瀛臺

賜食已復

賜魚大小四十恭紀

畫槩文憲

御舫開五龍雲水接南臺  
纔分玉箸蓬池膾親緇金鱗  
又賜來

中秋西樓讌集

久別東巖月還為北塞游  
關山頻對酒風雨一登樓  
坐減青山興歌添白髮愁  
兩年長肺病顛顚況今秋

瓮頭春酒昔得之林中丞  
家近日孫生穎力能釀  
此酒歲暮獨酌為作二首

風霜還飽舊時身相勸愁多酒  
入唇閉戶不邀杯底月  
隔年先探瓮頭春陰陽清濁元同器  
黍麥低昂亦有神  
一笑朱顏今宛在黃公壚畔見何人

收拾樽前見在身且教香味入吾唇飄飄北雪初霑地  
汎汎東風欲作春罷遣桃符驅歲鬼休催羯鼓惱花神  
天寒日晚霜威重一醺陽和已趁人

懷陟屺樓

回首關河草木黃浮雲西去野茫茫松楸未長霜先落  
陟屺樓空挂夕陽

城南水榭懷施愚山

漢陂連紫閣鳥影度秋屏遠望知巖壑高居接渺冥湖

光分裂帛山色擁來青花落題名處相思在敬亭

歲暮和子瞻與子由侍立邇英次韻絕句簡曹峨

娟編修四首

淒淒梅萼艷猶清寂寂年華暗欲零一卷牙籤雙白鬢  
不應黃色上天庭

侵曉衰顏鏡裏寒蕭蕭華髮鬢絲乾緇塵休點清霜色  
自愛新彈沐後冠

誰解先生謔浪言摧頽病鶴亦來軒如今恐被林鴉笑

夜宿朝飛為啄吞

東坡居士香山老出處差同晚節心不信千秋身寂寞  
名根終比道根深

次韻彭羨門編修

軟紅塵土又年餘久廢詩篇歎索居離別日多相憶老  
交游歲晚幾人疎閒門剥啄風微後好句摩挲月上初  
自點寒燈三過讀因君吟興未全除

鼻不知臭屺瞻學士頗用嘲謔戲簡

肺病經寒斗更加霜風如簇著含沙此身可入鮑魚肆  
有鼻誰聞薝蔔花未信運斤逢郢斲猶知舉扇向塵遮  
曉來頻嚏因君甚相憶連朝盡歲華

歲除有感簡杞瞻

華髮黃塵爆火前桃符土梗與周旋笑看敝帚千金貴  
懶點蛾眉半額妍空憶悲歡追昔夢且尋詩酒樂新年  
文書堆几風窗冷短檠頻移博醉眠

正月十日睡醒示豫朋往年嘗以是時宿新阡丙

舍

夢回窓外午雞聲  
睡足春陽潑眼明  
正似石間攜汝宿  
新年田舍老農情

蚤行憶石間

夢迴鐘漏客心闌  
馬首驚沙撲面寒  
只似石間風雪路  
不知春曉在長安

午睡夢朱檢討錫鬯覺而讀其集

荒荒欲落幽窗日  
策策時驚曲徑風  
一卷竹垞書在枕

離心繚繞夢魂中

二月二十六日同樊酉一飲酒城南古臺上

野廟無人春鳥鳴古臺高樹遠含情不因社日尋芳去  
嬾作城南半日行

堤柳

堤柳青如此山花紅奈何林鶯三月少塞雁一春多歷  
落愁心在羈遲旅鬢過吟詩聊自慰不覺是悲歌

社日黑窰厰同樊酉一

社日迴愁人高臺絕四鄰陰晴分遠樹烟雨接殘春地  
僻逢花少川長對酒頻柳陰澹斜照沙際一垂綸

送杜讓水令廣昌二十四韻

一線飛狐道雙鳬下

帝鄉地懸京邑險山接塞垣長留滯今為吏分岐忽異  
方野花開正落風雁過無行亭埃紛相接關雲鬱在望  
昔遊同寂寞往事默悽傷乍散圖書地虛隨翰墨場身  
名供刻畫文采益淒涼煩促賓朋絕凌兢笑語妨多才

勤贈處雅志必周詳詩與名家稱書兼姓字香拜官非  
卜式歎老是馮唐曾奏

重瞳聽還邀一命光孤城青塚月大漠黑河霜別意嗟  
飛動含情助激昂雄風生劍匣朔色映錐囊跡已輪屠  
釣謀仍恥稻粱故僚多背面薄宦易需蒙交道悲公叔  
心期感仲翔逢人難偃仰入世勿佯狂尚有遺簪戀聊  
為束帶忙青山對垂綬官舍解行裝荒外皆侯服邊沙  
盡我疆此邦有民社為爾決行藏

立齋都憲惠酒且盡戲簡二首

風雨城南一番新提壺相勸獨遊頻只今酒盡添愁坐  
花落花開不當春

已遣沉冥入醉鄉懶從燕市酒人狂故山亦有慈泉水  
乞取江南釀秫方

樓上獨酌二首

秋城如烟海看雲抵看山樓上一杯酒心與孤鴻閒  
孤鴻日夜飛悲鳴為曹偶道人學忘機離心亦何有

吳耕方侍讀急裝出廣寧門一夕卒於逆旅貧不能斂行道傷歎追悼寄其孤

多病交因密常貧世與疎旅亭一宿客昨日數行書道術終何得飢寒屢晏如文章曹志在流慟想充閭

答李子靜少司農兼索其書法二首

千古風流讓蜀人西當太白望峨岷眼高四海名無敵  
狂客誰為賀季真

春蚓秋蛇老未休戲鴻墨法晚相求即無金玉裝奩軸

肯設桓家寒具油

將卜居而灘泉酒垂盡簡郭快圃翰讀二首

灘泉  
郭釀

也

山泉美酒色香清故遣瓶罍細細傾自入青春嘗獨醉  
已多白髮未須驚賞心四事違朋好對影三人共月明  
今日一尊還寂寂憑誰相慰此時情

鴻飛翊雪去西東浮蟻堂中憶雪鴻

雪鴻郭  
堂名

樹下何人

知有道醉鄉我亦愛無功六分春色三杯酒半世生涯

一畝宮那有詩書堪乘載瓦盆傾倒向春風

檐鵲寄公幹

鵲踞寒檐日影來飛鳴遶樹卻飛迴忽聞小弟傳書札  
報道山花取次開

移居簡李鄴園大司馬

門徑黃塵迴未侵青春榮戟畫沉沉避喧每覺無幽處  
卜築翻因有素心新草臨窓生意淺落花欹枕夢魂深  
卻憐燕雀依檐棟敢道鵲鷺共一林

樓上聞笛

惆悵高樓月迴明  
關山無限曲中情  
薊城楊柳多春色  
解聽風前玉笛聲

史事偶閒戲題長句為醫者孫生

圖書跌宕謝公卿  
貧病交游尚有情  
藥裏年華逢薊子  
枕中仕宦笑盧生  
幾人青史題無愧  
自古黃金鑄可成  
留取一篇方伎傳  
塵埃擾擾勝浮名

新居春夜

白首孤吟迫青春永歎深幽懷耿斜月清夢覺寒衾小  
巷更籌密高樓雁語沉頻年羈客意飄泊又從今

送王仲昭還武林二首

太白飄然仙者流凌風挂席下滄洲眼中一勺西湖水  
橫海難為跋浪遊

鐵笛遺聲寄竹枝扁舟應過水仙祠閒堂賜墅笙歌地  
惟有湖山似舊時

對鏡

昏黑柴門稚子迎鄰雞催曉報人行試看青鏡如絲髮  
一日還禁白幾莖

開門

小院斜陽盡閉門過客無晚花開欲笑歸鳥自相呼淨  
業觀前念浮生問坦途後生都莫較看取白髭鬚

磨勘宿省中呈容齋兼懷黃麋給諫

殿廊槐棘晚森森斜日清烟紫禁深把卷幾回同笑語  
憐才終是共沉吟露寒桂子三秋色風落梧桐一夜陰

舊日鎖廳人好在白頭蕭颯映華簪

送魏環溪先生致政歸蔚州二首

君恩三疏得抽簪綠野新開古塞陰  
出處蚤關天下計清忠不盡老臣心

兩朝國是青編在一代身名白髮深  
金甲已銷耕鑿穩朔雲邊月快登臨

地近翻驚數仞牆龍門賓客鄭公鄉  
早瞻舊省尚書履晚拂清塵御史牀  
心事傳經留奏草功名報國在文章

非才欲達

重瞳聽乞取青山傍講堂

以黃柑羅酒博快圍灘泉之餉

灘泉味美罷村沽折券殘年謝酒壚獨酌已多還寂寞  
細斟欲盡失歡娛黃柑春色分三寸白墮霜醅換百壺  
洗醖風軒聊一笑開嘗容對馬軍無

歲晚與繆虞良

斜陽古巷歲空闌寥落寒廬亦故園梅際冷枝橫凍硯

雀邊疎影帶閒門縱拚泥飲防頻歎且為耽書與細論  
猿鶴幾時音信少荒雞唧唧似山村

甲子除夕

還看上苑江梅蚤卻憶樊川岸柳新畎畝心長驚別舊  
關河人老倦逢春庭前燎火年光換枕上鷄聲客夢頻  
辟惡桃枝先插戶六街車馬逐流塵

春日懷西園先生

流光堪把玩烟景易風颺旅夢牽花信春心著柳條露

多憐綠徑雨濕憶紅橋將老甘離別生涯付寂寥

卧病輟直奉簡入直諸公

半月雙扉畫掩深  
瑣窗朱網憶沉沉  
回驚廊閣三番仗  
稍學仙人五戲禽  
勾檢篋書稀日草  
料量圍帶減塵襟  
數憐

溫語垂

天問蒲柳先秋自不禁

聞雞寄逆旅故人

本置意難為報明疎林殘月半宵聲未回旅夢催人起  
底似征途惜別情

戴文進畫漁家樂

曾寫紅袍綠水隅衆中顏色果然殊蓑衣箬笠雲天濶  
可是秋江舊釣圖

七夕城南晚歸書興

碧落微雲月似鉤誰家簾捲曝衣樓流年巧婦矜紅粉  
半世癡兒已白頭河漢星低清淺水關山人老別離秋

夜涼一枕殘書夢潦倒西風萬古愁

答立齋都憲

涼風吹積雨晚景送新晴白筆秋吟興青編夜雨情  
名多綾餅艷心並玉壺清遙望臺中柏蒼蒼翠更生

江村垂釣圖

江湖且莫羨垂綸畫裏漁竿枉似真試看渭濱圖羽獵  
後車元載釣魚人

文衡山潑墨山水

供奉歸來野意閒  
紅欄綠浪五湖間  
誰知水墨蕭森物  
畫出荆關著色山

曉雪懷王幼華都諫

浙瀝疎更外  
霏微小雪時  
映窓何曙蚤  
著樹欲銷遲  
寒重花兼出  
霑輕葉暫隨  
坐殘鳩鵲影  
先遣掖垣知

雪夜懷簡翊聖

不見當時謔浪人  
銓花如畫鬢如銀  
癡兒難了公家事  
狂叟相憐自在身  
午夜雲山連雁影  
千門霜瓦冷魚鱗

風餐雪虐眠時蚤縮項寒廬一愴神

雪夜懷張子美子文

一片瑤華影霏霏入夜寒梅花疎故壘雪色滿長安漏  
下清霜迴風高玉笛殘那堪羈旅夕蕭颯獨憑闌

當關

當關呼不置殘夢幾迷離鳥宿夜還散雞聲寒漸遲窻  
梅風寂歷徑竹雪參差睡美輕鐘外何因得此時

卜居不定題家書後二首

題得鄉書附短吟  
地爐紙帳覺蕭森  
姓名已受當時責  
筋力空教老境侵  
蝴蝶夢魂寒抱影  
梅花風月夜同心  
只須乞取青山在  
江北江南宅易尋

夢回夜氣勘分明  
已睡還醒萬慮生  
古堞夜烏啼自語  
空梁山鬼嘯無情  
蔣山第宅終須棄  
潁水田園且未成  
羸得寒宵渾不寐  
風簾鐘漏度三更

歲暮夜歸寫懷寄南谿游好二首

拂面流塵倦曲肱  
人間只欲醉騰騰  
此身至老終成錯

時輩多才合讓能雪徑數聲傳漏杵紙窓一醖讀書燈  
絕交論廣休重擬五術平生實未曾

曉逐殘星暮落暉不成贈處不成歸尺書海內親朋斷  
晚歲天涯弟妹違河柳秋橋人判袂野棠春社酒霑衣  
叢祠西畔桑榆暖鼓笛聲殘隱翠微

病齒

平生未解巧如簧牙齒空然粲兩行善病終當留舌在  
多愁應不及脣亡相逢已守金人戒獨坐誰憐玉麈妨

身老得閒差自慰  
雪梅烟竹倚殘陽


露滑閣憶南谿

遠望當歸亦枉然  
登臨遙憶在南川  
亂山缺處杏花滿  
危閣前頭松影圓  
短笛吹斜牛背日  
暮鐘聲散雁行  
天清歌薄酒殘燈  
火此事拋離又五年

乙丑除夕移入青藤館新居

五春三度移居日  
桃梗椒花總閉關  
跌宕圖書新白髮  
漂搖風雨舊青山  
署門自信交游少  
卜竈先祈歲月閒

預擬送窮還罷卻殘年留伴老夫頑



午亭文編卷十三